

**PEMBERITAHUAN PERTANYAAN LISAN**  
**DEWAN RAKYAT MESYUARAT KEDUA, PENGGAL KELIMA**  
**PARLIMEN YANG KE-13**

**PERTANYAAN : LISAN**

**DARIPADA : TUAN TAN KOK WAI (CHERAS)**

**TARIKH : 25 JULAI 2017 (SELASA)**

**NO. SOALAN : 66**

**SOALAN :** Minta **Perdana Menteri** menyatakan dasar-dasar dan rancangan-rancangan untuk menggalakkan kesederhanaan dan pluralisma di negara ini sejajar dengan semangat Perlembagaan Persekutuan dan Rukun Negara bagi mencegah Malaysia dari menjadi tapak yang subur bagi pembiakan ekstremisme dan keadaan-keadaan yang tidak disukai (*intolerance*).

**JAWAPAN :**

**Tuan Yang Di Pertua,**

Perpaduan telah menjadi kekuatan negara ini. Kita telah menyaksikan sendiri banyak negara yang musnah akibat ketegangan hubungan etniknya sehingga berakhir dengan konflik berterusan. Namun, bagi Malaysia, masih tetap aman dan harmoni. Ini kerana Malaysia berupaya mengurus kepelbagaian selaras dengan dasar-dasar dan rancangan kerajaan yang berpaksikan kepada Perlembagaan Persekutuan dan Rukun Negara.

Antara rancangan dan dasar tersebut ialah:

- a) Pembentukan Majlis Konsultasi Perpaduan Negara (MKPN) pada November 2013 di mana ahli-ahlinya terdiri dari wakil-wakil pelbagai golongan masyarakat membuktikan komitmen Kerajaan untuk memastikan perpaduan nasional terus kekal melalui penyediaan **Blueprint Perpaduan, Kesepaduan dan Penyatupaduan** yang telah mengenalpasti 9 matlamat utama dan 16 cadangan sebagai asas bagi mengukuhkan perpaduan dan meningkatkan hubungan antara kaum melalui penekanan kepada sikap kesederhanaan, kesamarataan dan pluralisma.
- b) Kesungguhan Kerajaan merencana **Transformasi Nasional 2050 (TN50)** dan menjemput semua rakyat Malaysia khususnya golongan muda rakyat Malaysia pelbagai kaum untuk berkongsi suatu idaman membentuk sebuah negara yang maju dan makmur serta rakyatnya yang hidup aman damai dan bersatu padu demi mengelakkan sikap ekstremisme dan keadaan-keadaan yang tidak disukai (*intolerance*).
- c) Inisiatif Kerajaan dalam merangka **Pelan Strategik Wasatiyyah 2016 – 2020** yang merupakan satu anjakan paradigma ke arah budaya kerja yang lebih positif yang telah meletakkan **Pendekatan Wasatiyyah sebagai Dasar Negara** yang akan dipraktikkan dalam setiap faktor pentadbiran negara supaya dapat menyemai sikap kesederhanaan dan menjauhi dari terlibat dengan sebarang kegiatan ekstremisme.

- d) Mengadakan program dan aktiviti bersama badan-badan bukan kerajaan serta kumpulan-kumpulan keagamaan untuk mempromosikan persefahaman dan keharmonian serta toleransi di kalangan penganut-penganut agama seperti Sambutan **World Interfaith Harmony Week**, **International Day for Peace** dan **Hari Toleransi Sedunia (International Tolerance Day)**. Melalui sambutan ini yang telah diisytiharkan oleh Pertubuhan Badan-Badan Bersatu (PBB) bagi menggalakkan persefahaman dan dialog antara agama yang merupakan dimensi penting dalam budaya keamanan serta memupuk dan mendidik masyarakat umum ke arah pluralisma dan kesederhanaan.
- e) **Program Demi Negara** yang menekankan kepada penghayatan Rukun Negara sebagai asas perpaduan nasional melalui program **MyRukun Negara dan program Silang Budaya** diperkenalkan di 1,781 Tabika Perpaduan dan 6,068 Kelab Rukun Negara di peringkat sekolah rendah, di peringkat menengah serta 150 Sekretariat Rukun Negara di peringkat IPTA dan IPTS yang sememangnya bertujuan menanamkan sikap kesederhanaan dan menghalang dari terlibat dalam kegiatan ekstremisme.
- f) **Menyebarkan mesej dan slogan perpaduan** secara berterusan kepada rakyat Malaysia dengan penglibatan diterajui oleh syarikat-syarikat swasta, GLCs dan badan bukan kerajaan (NGOs) melalui produk dan perkhidmatan kepada masyarakat agar mesej-mesej ini terus dihayati bersama bagi menyemarakkan semangat perpaduan

Secara keseluruhannya, Kerajaan telah bersungguh-sungguh melakukan pelbagai usaha dan inisiatif untuk memupuk dan mengekalkan perpaduan antara kaum di negara Malaysia sejajar dengan Perlembagaan Persekutuan dan Prinsip Rukun Negara tetapi sebaliknya yang paling penting adalah rakyat sendiri harus berfikiran positif bagi menerima pluralisma yang sedia wujud dengan minda yang terbuka dan menghakis sebarang fahaman ekstremisme yang wujud dalam diri mereka.

Sekian, terima kasih.